

光緒重修安徽通志

重修安徽通志卷一百四十九

職官志

名宦 十三

滁州

漢劉平字公子彭城人建武中爲全椒長有惠政百姓感之或

增貲就賦或減年從役獄無繫囚

後漢書本傳

晉孔奕山陰人爲全椒令明察過人在官有惠化及卒市人若

喪慈親焉

晉書孔愉傳

唐韓思復字紹忠長安人遷滁州刺史州有銅官人苦鑛鑿爲

累思復爲賈他郡費省獲多有黃芝五生州署民刻石頌其祥

唐書

本傳

韋應物建中二年爲滁州刺史性高潔節食寡欲公餘焚香默

坐雖工詩而政不廢

唐詩紀事

關播字務元衛州人陳少游鎮淮南表爲判官攝滁州刺史李靈耀叛少游屯淮上所在盜賊蝟奮播儲資力給軍與人無愁

苦

唐書本傳

李德裕趙郡人文宗時徙滁州刺史郡縣無軍營軍士寓處寺觀不足則翦茅以居境內有淫祠緇宇凡二百四十餘所爲寇盜數德裕乃撤其屋制四營軍士獲安寇盜屏蹟

一統志

高錫望咸通九年爲滁州刺史龐勛陷滁州錫望死之

唐書懿宗紀

宋趙普字則平幽州人周世宗用兵淮上太祖拔滁州宰相范

質奏普爲軍事判官太祖與語奇之會獲盜百餘當棄市普疑

有無辜者啟太祖訊鞠之全活者眾

宋史本傳

李彥明知全椒縣建學宮新縣治政有丰采豪強折服四境帖

然南畿志

元時忱知全椒縣百姓愛之縣乏井民俱汲水襄河忱爲穿井縣門外聽人挹取至今呼元公井南畿志

曾肇字子開南豐人歷知滁和十一州類多善政宋史本傳

王禹偁字元之鉅野人至道初出知滁州初禹偁嘗草李繼遷制送馬五十匹爲潤筆卻之閩人鄭襄徒步來謁禹偁愛其儒雅爲買一馬送歸或言其買馬虧價太宗曰彼能卻繼遷五十馬顧肯虧一馬價哉宋史本傳

趙概字叔平虔城人慶歷初知滁州山東寇李二過境上告人曰我山東人也公嘗爲青州民愛之如父母我不忍犯率眾而去宋史本傳

王俞知全椒縣建學宮於縣東南襄水之側獎善懲惡訟平盜

息

南畿志

姚仲孫字茂宗商水人通判滁州歲饑詔發官粟以賑主吏不以時給仲孫至立劾主吏夜索丁籍盡給之

宋史本傳

常安民字希古邛州人謫監滁州酒稅至滁日親細務郡守曾肇約爲山林之游曰謫官例不治事安民謝曰食焉而怠其事

不可

宋史本傳

梅執禮字和勝浦江人元符五年知滁州時賦鹽虧額滁亦苦抑配執禮曰郡不能當蘇杭一邑而食鹽乃倍粟數民何以堪請於朝詔損二十萬滁人德之

宋史本傳

陳祐字純益仙井人徽宗時論章惇蔡京蔡卞郝隨鄧洵武忤

旨通判滁州

宋史本傳增修

黃師中建炎間知全椒縣縣廨燬於兵師中結茅以居清靜爲

治閭里盜發推尋其迹輒得之四境肅然

南畿志

張處厚知全椒縣復建縣治於市橋西北性廉介不妄取與馭

胥吏尤嚴飭

南畿志

魏安行樂平人以張浚薦知滁州州罹兵燹壇廟皆毀安行從  
草中得碑依政和法式立焉招墾土田民賴之

南畿志

辛棄疾字幼安歷城人乾道閒知滁州州罹兵燹井邑凋殘棄

疾寬征薄賦招流散教民兵議屯田

宋史本傳

許巽嘉泰中知滁州境內故有津渡三前守月賦錢巽悉蠲罷

仍各造舟以濟

南畿志

林嶠知滁州時州賦鹿非其土產嶠上言得免

南畿志

黃復字乾叟福建人寶慶二年進士累轉通判滁州金兵圍滁

復與州守陳廣中協力拒守廣中主西門復主北門射殺數千

人已而廣中中礮死復攝州事士氣復振城被圍八旬餘救援不至遺子書云父老矣食君之祿繼之以死猶生之年也前後數百戰而歿總制趙葵餉臣吳潛上其事官其子星廣皆從事郎

福建通志  
新增

趙葵字南仲衡山人紹定中知滁州以地當賊衝實兩淮門戶

修城浚隍經武不少暇

宋史本傳

元劉琪字德卿泗水人至元間知滁州創鐘樓建永濟橋增置

大成樂器

南畿志

杜居敬開封人泰定初為來安尹廉謹有惠政尤汲汲於興學

校崇教化歲蝗居敬齋沐致禱蝗不入境

江南通志

楊樸字文素河南人至正中尹全椒寇入城樸盡殺妻女朝服

坐堂上盜欲降之樸指曰我已盡戕眷屬正欲死官守耳乃連

唾之賊繫樸倒懸樹上而割其肉至盡猶大罵弗絕

元史本傳

蔣居仁揚州人至正中尹來安精於吏治民樂其政

南畿志

明周鼎鄞縣人洪武八年知滁州始滁隸中書省事皆符下有

不可者封上之已隸鳳陽府守數加苛責毛舉細事以撼鼎鼎

上聞得直滁當孔道簿書填委鼎嚴明綜核治最他州

江南通志

吳頴字克懷閩人永樂初授全椒教諭全椒諸生或形家言築

文筆峯致飛語動上怒頴引罪自縊事乃解諸生王冕等爲卜

葬南山之陽

江南通志

陳連字廷器東莞人永樂五年知滁州政教兼舉治爲江北諸

郡最秩滿滁州人請畱詔以知府階仍知州事

南畿志

畱衢正統中知全椒縣有循良之政

江南通志

周正字孟端安陸人天順八年知滁州有治績聲望與陳連相



埭江南通志

趙禮成化間知來安縣創築土城繕學宮作官廨立市廛修隄

防百廢俱興江南通志

曾顯字克達泰和人宏治三年知滁州滁當衝要方貢夫馬繹

騷民苦煩費顯議中道池河為定遠西徼設站協之河決徐州

田租不入撫按議令滁代輸顯力爭得免江南通志

孫贊正德中知全椒縣修建賢宮堂廡率出俸錢成之視學造

士時稱良師江南通志

林文卿正德中全椒教諭時方遷建學宮文卿悉心監督工皆

堅緻課諸生鄉射悉如古禮江南通志

陳則清福建人嘉靖中知滁州歲大旱發廩賑貸逾年疫作民

病不能行因量地設場為糜食之又請折鳳麥以免輸運之苦

江南  
通志

王邦瑞字惟賢宜陽人嘉靖中知滁州時徭傳馬驢取具田丁  
又屯所養馬田地多乾沒邦瑞力請蠲逋欠均科派平馬政減  
重徵得旨釐覈民困以紓

江南  
通志

趙鏜嘉靖中知全椒縣衛屯恣虐鏜大爲懲艾仍請於屯田御

史每屯置老人轄之稱良法

江南  
通志

凌約言嘉靖中知全椒縣民苦養馬豪黠詭爲邑供丁而以馬  
役遺下農約言釐弊懲奸酌量盡善邑自是無馬患河南師尙

詔反糾集丁壯預爲三覆以待寇聞風潛避

江南  
通志

顧問嘉靖中由御史謫知來安往時六合滁陽南北夫馬率有  
驛路後改經來安遂成孔道民苦供億問悉爲禁絕驛困以蘇

江南  
通志

魏大用嘉靖中知來安前令趙禮築土爲城久圯大用悉力經

營易以磚甃百姓安堵

江南通志

張四術嘉靖中知來安廉謹愛民故事六合夫馬迂道來安四

術力請禁之

江南通志

丁士奇萬厯間知滁州建四隅角樓以備守望監司取餒金逾

額帑積不支自鬻家棗園償之

江南通志

陳允升萬厯中知滁州滁田瘠糧重民不能供每有棄產去者

允升履畝清丈計額均賦一境賴焉

江南通志

孫森萬厯中知滁州衛弁忌其嚴覈據訴監司森抗對得白因

寘侵帑諸弁於法時郵遞衝疲勘合白牌雜還至森調度有方

江南通志

田樾萬厯中知全椒縣立漢劉平祠顏其堂曰仰劉縣治後河

南北通省行者病涉移諮和守各造浮橋至今利濟

江南通志

樊玉衡萬厯中以御史建言謫無爲州判遷知全椒敬禮耆碩

表章先賢因俗便民除蠹尤力尋膺薦督理漕河抗疏請冊立

太子謫戍雷陽道經滁滁民傾城走送

江南通志

劉是萬厯中知全椒崇禮節孝鋤翦豪強

江南通志

關驥萬厯中知全椒下車值加派呵夫毅然爲民請命以去就

力爭遂得末減

江南通志

管學經萬厯中知全椒縣親文弱而施政有方摘發奸欺屢獲

鄰境大盜

江南通志

吳羽文萬厯中知全椒縣煦嫗良善拊擊豪強諸所興除皆大

利害爲人冰蘖自持顰笑不假

江南通志

錢應元萬厯中來安教諭會令虐士誣揭上官應元不避嫌忌

重刊安縣通志 卷二 風土  
抗白其冤

江南通志

秦植天啟中知全椒未下車卽發諸吏蠹狀人以爲神旣至杜

苞苴除耗羨薄稅通商調知懷甯行篋無加於舊

江南通志

程道壽孝感人崇禎中知來安縣解職歸賊陷其城置掌旅守之而去道壽結壯士殺之賊至被執令爲書招白雲寨大罵遇

害

一統志

孔尙則聖裔崇禎時知全椒時軍興旁午徵調無虛日尙則咄嗟立辦至里役長催火耗起解等件久滋民累一切釐革

江南通志

國朝甯鳴玉字楚珍順天人順治十四年知滁州時賦多逋欠鳴

玉按籍清釐分限立單令逋者照輸各給完狀後江南州縣多

以奏銷被遣滁獨無恙

江南通志

湯九圍奉天人順治間知來安縣邑故凋敝田畝多鬻於省州

紳士土著存者什裁二三里役大爲民害九圍定爲官收官解之法積困以蘇

統志

楊鶴年字清華滿洲人順治十六年以鳳陽府同知署滁篆時海寇入犯滁密邇會城人心惶擾鶴年密爲守備以靜鎮之譌言繁興皆置之不問直指及備兵使者服其持重有請輒報可士民賴之

江南通志

鄭邦相字文僑咸甯人康熙六年知滁州治尙簡靜首申功令令輸賦者自封投櫃革僉報徵糧里甲積困以蘇聽訟委曲開諭民多感悔威惠並著萑苻亦爲屏息

江南通志

藍學鑑字資宸福建上杭人康熙七年由舉人知全椒縣簡訟寬徭愛民禮士遇旱蝗則禱於壇賑於郊藥於肆矜恤災黎慮無不至

江南通志

趙清貞字幹周奉天人康熙十四年知滁州值歲大旱力懇上官題請蠲賑旋得報可全活無算聽訟明敏片言剖決民皆懾

服一統志

江天泰江西南豐人由進士知全椒縣廉正聰察幹理優長凡便於民者知無不爲御史極嚴決大獄治大奸屹然如山不可動以耿介忤上官意論罷士民奔走如失慈父母焉全椒縣志

王政江蘇吳江舉人考授內閣中書充江西同考官改全椒教諭申學規勤考課爲文羽翼經傳不以馳騁爲能學者稱定夫

先生全椒縣志

王齊英雲南蒙自舉人知全椒以廉靜爲治愛民若天性時久旱夜則私禱於內署至泣下旋大雨有秋判事若流水不輕遣一吏至鄉里故胥役多散去以僉解河夫失官遮路歧哭者踵

相接行藥蕭然襖被外惟書數卷而已

全椒縣志

秦廷堃漢軍鑲黃旗人知全椒縣明察善斷人不敢欺有黠盜獲而復逸故爲小竊匿鄰獄廷堃適護鄰篆閱囚一見卽曰此某盜也歸之獄乃定其精明類如此

全椒縣志

黃文蓮江蘇華亭人任全椒教諭文章經術卓絕一時獎掖諸生多所成就秩滿遷河南知縣

全椒縣志

董瑄山東章邱人知全椒廉潔慈明勸農息訟禱雨雨沛蝗不入境刊制義綱目以惠士林尤能振拔單寒童試前列二十名學使者甄錄其十八一時稱爲僅事云

全椒縣志

李明魁甘肅武威人知全椒縣公勤廉恕倡修學宮優禮寒素先是學使按部長吏供張之費例取給於新進諸生名曰公攤明魁至革除之其爲政務持大體如此

全椒縣志以上舊志



呂轍字天衢山西鳳臺人乾隆初任池州府通判時有火災轍治水具捐募夫役以救之辦賑青陽石埭水災擘畫周至署廣德州廣德租稅佃人輸官田主不問故多逋負轍以富者擁貲貧者受笞督非法也力革其弊恭值

高宗南巡賜貂皮緞疋獎其治芻餉勞績調潁州府通判擒治劫盜窮

其黨署壽州讞吳姓被殺獄得殺人者而釋其株連數十人署滁州碩鼠食苗設機盡捕滅之又賑水災一如其在池州時乾隆二十一年監修鳳陽城卒於工次

劉大槐撰墓表以下新修

韓夢周字理堂山東濰縣進士乾隆中知來安縣立學校興農桑募其鄉蠶工教民蓄山蠶於柵樗樹上得巨繭以織帛刊布其法增築書院朱子祠堂建清江書院邑多圩田旱澇無備夢周度地疏濬詳記前衛官李之琨議撰圩田圖記以垂永久道

光初祀名宦

祠閣鈔

肝胎王效成伊  
蕭室文集  
來安縣志

楊忻字景山雲南太和舉人嘉慶中任來安知縣廉潔惠愛折

獄敏果葺城築倉倡修學宮及魁星閣明倫堂建橋梁數處舊

有雁塘學田爲江南人占入省城育嬰堂忻力請復之

來安縣志

承瀾撰來安重修儒學記  
賀彝鼎撰歸復雁塘田記

符鴻湖南益陽人任來安知縣道光三年重修建陽書院甄錄

生童優給膏火振興文教

來安縣志

李士林字藝圃雲南通海進士道光中任滁州知州方嚴清介

民不敢欺修城垣置義倉葺豐樂亭在任十餘年以老致仕咸

豐初卒於全椒

滁州志

潘忠駉字炳甫浙江監生咸豐元年以通判署滁州事練團積

穀爲守禦計二年四月髮逆由揚州北竄忠駉會營督練擊賊

受傷卒蒙

恩卹銀兩世襲雲騎尉

滁州志

盧承祖江西南康舉人道光二十九年任全椒知縣咸豐三年募勇督練防堵髮逆積勞卒於防所

贈同知銜廕子縣丞

全椒縣志

孟煊浙江山陰舉人道光十七年任全椒知縣剛決清廉士民愛戴二十二年調鳳臺咸豐六年檄委幫辦全椒縣事八年城陷督戰北關死之九年

贈知府銜廕子州判同治七年奉准建立專祠

全椒縣志 會同藩奏案

馬步衢直隸通州人咸豐七年任滁州衛守備八年髮逆由全椒犯滁步衢率本幫軍丁迎剿矢盡力竭遇害

滁州志

廖新字琴舟湖北羅田監生同治三年署滁州事當撤防之初

諸務草創良莠雜處新恩威並用休息培養民心大定遷鳳陽同知去滁人送者塞道旋聞新卒皆墮淚云

滁志

### 和州

晉謝尚字仁祖陽夏人爲建武將軍歷陽太守轉督江夏義陽隨三郡軍事爲政清簡始到官郡府以布四十匹爲尚造烏布帳尚壞之以爲軍士襦袴歷豫州刺史鎮歷陽在任有政績升平初卒於歷陽

晉書本傳

宋劉湛字宏仁南陽人梁郡太守領歷陽爲人剛嚴用法奸吏犯贓百錢以上皆殺之自下莫不震肅

宋書本傳

王淮之字元曾臨沂人元嘉二年歷陽太守行州府之任綏懷

得理軍民便之

宋書本傳新傳

齊周山圖字季叔義興人泰始五年爲龍驤將軍歷陽令領兵

守城討臨海田流平之擊斬豫章賊張鳳

齊書本傳  
新增

梁張齊字子響馮翊人歷陽太守齊手不知書目不識字而在

郡有清政吏事甚修

梁書  
本傳

隋慕容三藏燕人大業元年授和州刺史三年轉任淮南太守

所在有惠政

隋書本傳  
新增

唐張無擇慈谿人和州刺史時水潦害農無擇請蠲穀賑之採

訪使李知柔素不快其直諫密奏以附下爲名貶蘇州別駕老

幼遮道攀留

舊唐書  
補注按舊唐書無張無擇傳江南通志  
引舊史文如此又歷陽典錄引江南通志無擇字

君選句章人今江南通志無  
此六字句章唐應稱慈谿

張知讐字匪躬

新唐書  
蒲州河東人新唐書幽  
州方城人徙家於岐天授後

和州刺史歷十一州所莅有威嚴人不敢犯

舊唐書本  
傳補注

劉禹錫字夢得彭城人以王叔文黨貶連州累刺數郡太和二

年自和州刺史徵還有和州刺史廳壁記陋室銘和州諸書新舊

唐書本傳

劉夢得集

穆甯懷州河內人和州刺史治有狀增戶數倍唐書本傳

新舊

南唐王彥儔和州刺史有政績善撫境內和遂爲富州南唐書本傳

增新

朱凌冲字子和蘇州人知含山秩滿東裝家人有蓄一砧者冲

視之曰非吾來時物命還之南唐書志

范純仁字堯夫吳縣人熙甯中知和州德政著聞嘗謂人曰惟

儉可以助廉惟恕可以成德宋名臣言行錄

劉摯字莘老東光人熙甯中謫監衡州鹽倉後徙知和州有善

政一統志

胡宗愈晉陵人熙甯中知和州明敏英毅訟至立決一統志

吳居厚豫章人紹聖初知和州創將理院致醫藥病者有歸多

所全活

東都事略

又奏減苛征罷無名之稅

和州志  
新增

孫長卿字次公揚州人知和州民訴人殺弟長卿察所言無理

問其貲曰上等也家幾人曰唯此弟曰然則汝殺弟也鞠之服

郡人神明之

宋史本傳  
新增

宋昌祚爲和州鈐轄建炎二年烏珠犯和州圍數日昌祚與禁

軍指揮使鄭立共激士卒晝夜備禦不少怠城破昌祚立與權

倅唐璟歷陽令蹇譽司戶徐煥縣尉邵元通軍士胡廣皆死譙

樓上

宋史  
本傳

姚興相州人充荆湖南路兵馬副都監隸都統王權麾下金人

渡淮權遣興拒之而退保和州興與金人遇於尉子橋力戰殺

數百人告急不應父子俱死贈容州觀察使立廟賜額旌忠賜

諡忠毅

宋史本傳  
增修

韋永壽和州統制紹興三十二年與金射鵬軍戰和州子奉節

郎世堅救之同死贈融州觀察使世堅贈三官

一統志  
宋史本傳

冷世修字良器通判和州時守尚巖峻世修濟之以寬吏民愛

戴秩滿相率詣臺使乞畱

南畿志

婁機字彥發嘉興人含山主簿治銅城圩八十有四役夫三千

有奇機設廬以處之器用材埴一出於官民樂勸趨二旬告畢

七攝鄰邑皆以治績聞

宋史本傳

杜庶字康侯先爲廬州安撫使治績甚多後知和州浚城濠增

守備修學宮

宋史本傳  
新增

賀鑄字方回衛州人

宋史本傳和州通判志

監和州管界巡檢夜

行所部盜不得發

慶湖集  
新增



趙師昂嘉定三年爲和州觀察使有惠政

南畿志

鍾將之字仲山知和州歷陽縣平易近人民懷其德屯田與民

田相錯官軍恃強失和將之常持其平

漫塘集  
新增

印應雷通州靜海人嘉熙二年進士寶祐二年知和州時北兵

侵和應雷之任率兵突入士氣益振卒保其城

鄧獻常熟志  
新增

元疊卜泰字允恭蒲城人泰定中烏江縣監有狄氏子者兄弟

九人分異十餘年爭訟卜泰庭諭之九人感悟復同居又有陶

姓者死而孤弱族人利其產取他姓子給曰此陶養子也卜泰

廉知之按舉其罪歸其產於孤在邑三年民順其化

一統志  
南畿志

馬澤字潤甫任邱人知和州以經術飾吏事禮師儒修庠校均

戶役年歉籌畫賑饑全活甚眾

南畿志

明李相字彥章甯波人洪武初由京兆尹出知和州建州署築

郭公銅城二壩

南畿志

陳琦字士英霍州人洪武中知和州民服其化男女異路囹圄

空虛

南畿志

徐原顯黃巖人洪武十四年始立含山縣原顯知縣事經始百務凡縣治城隍皆其創置

一統志

戴泰一福建龍溪人永樂初以隱逸應召知和州以清白稱

南畿志

侯潤甯海人正統十一年知和州嚴明廉幹鋤強扶弱民化爲

善訟簡盜息

明統志南畿志

黃潤玉鄞縣人景泰初知含山縣鑿渠塘築隄堰躬課耆洩

江南通志

通志

劉隆廬陵人天順六年知和州實倉廩平糶糴歲凶民賴以給

三  
奸胥病民必按法懲治不少貰訟至曲直立判

南畿志

董錫會稽人天順中和州同知均徭役清軍伍修營宮興水利

南畿志

吳漣南海人成化中知含山樸易廉潔以德化民歲饑作餽粥

餉流移所活萬餘人公餘進邑諸生設帳講易

廣輿記

林長繁莆田人去治中知和州愛民惜財案牘詳審

江南通志

顧珀字戴祥晉江人正德四年知和州簡訟輕役發姦摘隱

江南通志

通志

孔公才字希文曲阜人正德中知和州渠寇劉六猖獗練兵修

城復鑿重濠賊知有備不敢犯

江南通志

祝宏舒四川人正德七年知含山縣崇學校毀淫祠清戶口平

賦役

江南通志

賈應春真定人嘉靖七年知和州事至立剖奸胥無所措手

江南通志

孟雷澤州人嘉靖十一年知和州辭色不少假而內實坦易僚

佐皆以臺部左遷以雷年少數易侮之雷風節不少挫羣僚心

服

江南通志

張叔宣內江人嘉靖二十三年知和州民有訟者輒和顏諭之

每里擇有義行者一人勸民以禮使勿爭訟嘗以菜羹召諸僚

食之廩過客亦不重肉曰不忍剝民以悅人時有陳侍御北上

叔宣裁其夫役陳不能平尋按廬鳳廉叔宣清介更力薦之

江南通志

陳冠南昌人由刑部郎謫和州同知均徭除羨課士勸農鰥獨

無告者時出俸錢周之

江南通志

鄭曉海鹽人嘉靖中由吏部郎左遷和州同知多惠政性簡淡

居城西峨嵋書院公事之暇著述不輟

江南通志

晉朝臣洪洞人隆慶七年知和州清里甲除奸蠹崇獎節義甄

拔寒微

江南通志

郭繼芳字履謙富順人萬厯中知和州建巽塔修泮宮

江南通志

袁伯鑰豐城人萬厯初知含山田畝戶口詳請立一條鞭法積

弊以清

江南通志

黎宏業字孟擴廣東人崇禎時知和州乙亥冬張獻忠圍城將

陷宏業繫印於肘跪請於母李氏母泣諭曰子勿以我爲累事

至此有死而已遂自縊妻楊氏妾李氏及四女皆自縊宏業乃

望闕慟哭以硃題壁爲官不負民爲臣不負君忠孝誠已盡生

死安足論引佩劍自刎未絕復濡頸血書曰爲臣死忠爲子死

率大丈夫何惜一死哉賊突入被傷數刃而死事聞贈太僕少卿廕一子同時州判錢大用同妻妾及長媳死學正康正諫訓導趙世選吏目景一高皆死之

明史本傳  
江南通志

國朝徐萃字元伯山東臨清人順治初知和州以簡御煩以惠兼義公餘讀書課士有風雅之遺民肖像祀之

江南通志

任憲伊清潤人順治四年同知和州有惠政遷兩淮運判士民

思之

江南通志

朱長泰字謙茹德平人順治閒進士知含山縣嚴正果斷有龍圖再出之謠鄰民有冤抑上控輒求下含山讞訊獎善黜惡不遺餘力三年考績以廉敏著稱

江南通志

楊繼芳字仲延南和人順治十七年知和州爲政敏給簿書叢錯綽有餘閒在任期年百務釐舉四野謳歌

江南通志

夏瑋字禹貢甯遠人康熙九年知和州均賦役省獄訟城垣就

圯捐貲繕築不以擾民復修學宮纂志乘百廢俱舉

江南通志

周元宰金州衛人康熙十六年知含山縣徵輸令民自納革里

甲兜收之弊歲饑多方賑恤課民力田不足者給以牛種升江

甯同知去之日士民請畱者數千人

江南通志

石參字星川奉天人康熙二十八年知含山宅心仁恕下車有

不破一家不傷一士之誓賑卹災黎革除科派省差擾以息民

嚴保甲以清盜卒於官士民立祠祀焉

江南通志

何偉字五峯奉天人康熙三十九年知和州臨政勤敏馭吏嚴

明歲災區畫賑卹存活甚眾催科不事鞭扑輸者恐後禮師儒

葺黉舍卒於官州民奉主與石參同祀號二賢祠

江南通志以上舊志

許士貞虞城人康熙四十年任含山縣聽斷如神省徭役興學

校紵誦桑麻時稱樂國

歷陽典錄以下新修

管繩萊字孝逸江蘇武進人道光六年任含山知縣善斷疑獄廉得殺人移尸者置法濬城內市河捐修濱江隄埠立石禁裕溪口米市陋規決和州人與含山人爭銅城閘堰埠之訟十一年水災繩萊已病去官猶典衣裘畀民圩搶築江隄去而見思

江蘇武陽合志

管氏家傳

盧光綸字湘舫江甯廩貢任和州學正咸豐初辦理團練加國子監學正銜升淮安府教授未赴八年髮賊再竄和州督練堵禦死之

和州志

戴立功浙江慈溪人任和州牛屯巡檢咸豐初團防助剿迭次接仗受傷病卒子未入流渠成於咸豐七年禦賊於駐馬河死

之

和州志



林蘭大興縣人前任無為知州咸豐九年署和州因州城未復  
畱定遠軍營斃軍火局六月城陷闔門殉難

旌卹如例定遠縣志翁同書奏案

廣德州

宋范仲淹字希文吳縣人廣德司理參軍日抱獄牘與守爭是非  
守盛怒不為屈歸必記其往復折辨之語於屏至字無所容  
改集慶節度推官貧止一馬鬻之徒步而去宋名臣言行錄宋史本傳

范師道字貫之吳縣人知廣德縣縣有張王廟民歲祠神用牛  
數千師道禁絕之宋史本傳

錢公輔字君倚武進人治平閒謫為淮州團練使呂誨救之不  
得逾年起知廣德軍舊學在城北以卑隘徙之東南嘗撰學諭  
委曲訓誘使人知所崇嚮宋史本傳南畿志

朱嗣孟樂平人爲廣德司戶兼司理叛卒戚方犯廣德嗣孟直

詣賊壘爲陳逆順禍福方以忤己殺之事聞贈宣教郎宋史王傳

孫覺高郵人熙甯二年詔知諫院青苗法行覺條奏其妄王安

石大怒劾之出知廣德軍宋史本傳

王儔權通判廣德軍戚方引兵過廣德入其郭儔不屈與判官

李唐俊司法潘偶權知廣德縣韋積縣丞蔣夔皆死宋史本傳

洪興祖字慶善丹陽人紹興中知廣德軍視水源爲陂塘六百

餘所民無旱憂宋史本傳

盧彥德字國華麗水人知廣德軍建平縣舊版籍有絕戶物力

錢抑民代輸鎌疋民苦之多逃亡彥德至大搜隱漏以實升降

削虛產三千餘戶於是逃者復歸浙江通志新增

熊彥照淳熙六年知廣德軍歲祲發倉賑給治爲江東最南畿志

耿秉由知廣德軍歲凶發倉粟賑給活饑民萬餘甯宗聞之璽

書褒異

南畿志

章一璧字君玉浦城人寶慶元年知建平縣振興學校深得治

體

南畿志

趙彥誠嘉定中知廣德軍興學校重鄉飲置田以贍生徒立爲

善齋以教宗子

南畿志

林棐紹定四年知廣德軍奏蠲兩縣逋租一萬五千餘石代輸

積欠十二萬貫公餘輯桐汭新志二十卷

南畿志

施德懋會稽人端平閒知建平縣歲凶力行賑貸士以無養多

失業招集教之復學田五百畝贍焉

南畿志

黃震字東發慈溪人通判廣德軍初孝宗頒朱子社倉法於天

下廣德之民困於納息人不敢議震曰法出於聖人猶有變通

安有先儒立法不思救其弊耶爲別買田六百畝以其租代社倉息約非凶年不貸而貸者不取息郡有祠山廟江淮之民禱祈者數十萬牲皆用牛又有自撻桎梏自拷掠以徼福者悉禁絕之

宋史本傳

常楙字長孺海鹽人監江淮茶鹽所蕪湖局不受商稅贏咸淳中知廣德軍郡有水災發社倉粟以活饑民官吏難之楙先發而後請專命之罪置慈幼局立先賢祠故事郡守秋苗例可得米千石乃以代屬縣償大農綱欠

宋史本傳增修

王介字元石金華人知廣德軍韓侂冑隸人蘇師旦忿介不通謁目爲僞黨有勸其自明者介曰我幾已種種豈畏鼠輩耶侂冑亦懼公議不敢發

宋史本傳

王汝翼宋末知廣德縣元兵入境汝翼死之

南嶺志

元王勉字懋德婺州人大德間升建平嚴私謁會大饑疫殫心

賑卹復求良醫給藥多所全活後卒於官子孫家焉

江南通志

胡定國字環孫大德間典建平學事興復學宮橫經講說以道

正人士類頌之

江南通志

明陳甯洪武初授廣德知府歲旱百姓告災太祖不許甯赴京

奏曰天旱田禾不收若復督征必逃徙之蘇州是爲張士誠益

民也太祖曰爾大膽敢如此言從之

南畿志

張翼字鵬飛合肥人洪武三年知建平縣興舉廢墜規模整飭

江南通志

羅坤泰吉水人永樂中知廣德州興學造士祛弊息爭一郡稱

江南通志

魯鐸泌陽人由國子生知建平縣政務寬恤視民事如家事去

後民思之

江南通志

李觀字廷賓武昌人正統八年知建平縣建學宮築陂塘創預

備倉及壇壝郵舍

江南通志

周瑛字梁石莆田人成化閒知廣德州巡行原野察農勤惰更示蠶繅法訓迪士子恆至夜分著廣孝慈錄及祠山雜辨以諭

民

江南通志

邵蕃字文盛餘姚人成化中知建平縣清介愛民不任威力

江南通志

通志

孫紘字文冕鄞縣人宏治閒知廣德州誠信廉能鎮靜不擾

江南通志

通志

江暉字景孚仁和人正德中知廣德州出不坐乘食無兼味武

宗南幸江以南率苦供億暉措辦得宜一方獲安

江南通志

趙崇賢字次山浙江人正德四年知廣德州時方議津貼建平

軍需以助養馬崇賢曰馬政派自草場軍需出於田畝縣民食

田力而州民為之納稅非制也亟白憲司停止之

江南通志

鄒守益字謙之安福人嘉靖初由翰林謫判廣德州創復初書

院置學田講良知之學士類翕然從之

明史本傳

陳德騄字房甫應城人嘉靖中知建平縣諸羨餘悉充正賦申

減牧馬之額裁諸色供億履畝覈丈積弊盡除

江南通志

連鑛永平人嘉靖閒知建平縣俗奢好訟鑛嚴宮室踰制之禁

導以禮讓明律善斷獄無冤民奸民虞順倡亂設策擒之

一統志

趙佑卿字汝伸嘉靖四十五年知建平縣築山陽楊學潘成等

圩

江南通志

朱鼇湘陰人嘉靖中建平縣丞倭躡郡邑鼇甫至即率民兵往

禦至上海孤軍援絕倭眾猝至遂遇害斂時創鉞滿體士民哀

之

江南通志

陸長庚字元白平湖人萬歷十一年知廣德州新營宮置學田

課耕濬渠置倉水陽以便軍民

江南通志

朱之楫字斯濟通山人萬歷中知建平縣遷學宮墾浮湖廢地

開西河增置義倉

江南通志

張宗

廣德州志作崇

信字西銘太原人萬歷中知建平捐潔自持親民

禮士與前令朱之楫竝稱循吏今合祀西郭外

江南通志

胡子晉德清人萬歷中同知廣德州佐郡六載攝篆者三公明

嚴正豪猾斂跡日用蔬茹悉自家載至

江南通志

向萼輝慈谿人萬歷三十六年知建平謹權量平物價學宮舊

建東門外屢圯於水爲出俸錢遷之

江南通志



陳良符孝感人崇禎時知廣德州不事苛察民服其化歲旱徒

跣祈禱大雨立沛一時傳為程公雨

江南通志

侯佐字弼時解州人崇禎八年知建平奉檄築城期年工竣時

溧陽大盜白晝剽掠佐練習義勇設策擒之

江南通志

何宏仁字仲淵山陰人崇禎十一年知建平吏不忍欺歲大旱

步禱赤日中大雨如注飛蝗千里不入縣境

廣輿記

趙景和字靈霄錢塘人崇禎時知廣德州馬士英擁兵走浙以

書索餉景和曰吾不能齎盜糧傳集鄉民悉入城避亂士英怒

督兵攻城城陷景和奮臂裂眦數士英誤國害民諸罪遂遇害

廣德州志

金印榮武進人崇禎時授廣德州學正持己端嚴誨人不倦時

論比之胡瑗

江南通志

國朝崔成名字仁齋安肅人順治初知廣德州時有土寇聚山藪剽掠成名躬帥兵搗其巢穴擒賊數千人民始安堵查覈糧稅申免州縣溢額銀四千九十餘兩

江南舊志

張正中字文臺河南人順治三年知建平縣招徠逃亡墾藝荒瘠覈戶口稽疆畝冊籍釐然學宮就圯捐俸修葺士民德之

江南舊志

通志

陶爾性字還一咸甯人順治十年知建平縣寬仁愛民而嚴於馭吏治邑三年有麥秀兩歧之瑞

江南舊志

孟希舜字華宇奉天人順治十一年知廣德州外寬內嚴敢於任事請免州縣地畝溢額銀六千七百餘兩十二年歲旱勘災申豁秋糧十分之一民賴之

江南舊志

秦確輝縣人順治十三年知廣德州廉能明允剔弊除奸州民

戴若父母

江南舊志

彭長庚字太白奉天人順治間知建平縣年甫二十姿力英邁

案牘目十行下片言決遣猾吏臈落又虛懷嗜學隆禮師儒舉

卓異第一

江南通志

柏肯堂字冰龕臨清人順治戊戌進士知建平縣值歲饑多方

賑濟全活數萬人查覈丁糧造赤歷冊積逋俱清嚴絕逃旋

義未

詳字典奸民斂跡

江南通志

嚴昌構字孟修仙游舉人知建平縣政簡刑寬嘗捐俸修整學

宮力除積弊

福建通志新編

胡擢力字耐菴湯溪人康熙三十五年知建平縣是年冬苦雨

虔禱卽止次年夏大旱禱雨又立應以疾卒官士民悼之

江南通志

休之愈山陰人雍正初知建平縣清廉愛民以捕蝗致疾卒於

塗次

廣德州志

曾尚增字南村濟南人由翰林出知廣德州嘗乘怒重撻一人

尚增父不悅長跪請罪自此益慎於刑

廣德州志

周作淵河南商城人乾隆四十四年知建平縣捐廉興建耶溪書院增諸生膏火之費建平地形窪下夏秋閒山水驟發常爲民患作淵於東門外及河之南設法築隄以衛田廬至今賴之

建平縣志

帥家相字卓山乾隆閒知廣德州有某甲遠歸數日忽不知其

所往其家疑其妻殺夫既誣服矣家相持不上踰年某甲歸婦

得釋

廣德州志以上舊志

金鼎壽字鶴皋貴州進士道光五年任歙縣知縣有惠政卓異

赴部回任候升委讞黜縣程宗賢獄平判輕湔兩造感泣七年

任懷遠愛士撫民不尚操切十一年升廣德知州政績卓異士

民愛戴祀名宦祠

彭縣藝文志 懷遠縣志 以下新修 廣德州志

鄒祖堂字錫蕃江蘇吳縣人道光二十年官建平縣梅渚巡檢

在任十三年宵小斂跡民間爭毆立爲剖決建平有西朔納諸

山水屢橫溢知縣錫麟令祖堂築圩衛田督工不懈水患以弭

民間不解蠶桑祖堂自購桑種令妻飼蠶繅絲民婦傳其法蠶

桑之利遂興著有蠶桑事宜及人生必讀書刊行又補刊前任

知縣貢震建平存稿周作淵郎川公事略

建平縣志

何豫綸常州舉人咸豐八年任建平知縣十年粵逆圍城豫綸

同把總張鳴皋督眾守禦城陷均死之

建平縣志

高禎順天東安拔貢安徽直隸州知州咸豐十年署廣德知州

粵逆竄犯率勇堵禦十一年督隊襲賊力戰陣亡

廣德州志

王成錦江蘇婁縣人咸豐十年署廣德州廣安巡檢駐焦村粵  
逆竄犯殉難男婦七人皆從死

廣德州志

### 六安州

漢劉順字平仲光武族兄建武八年擊破六安賊因拜爲六安  
太守帝徵之吏人上書請畱十一年卒

後漢書本傳

北周柳遐河東解人保定中霍州刺史導人務先以德再三不  
用命者乃微加貶抑示恥而已其下感而化之不復爲過咸曰  
我君仁惠如此其可欺乎

北史本傳

宋程端中伊川長子靖康末知六安軍建炎三年北兵至殫力  
守禦不克死之吏民葬之於霍山縣之撞山

南畿志六安州志

元王大有字廷祐澶淵人至正間知六安州事課農桑興學校

治績稱最

江南通志

朱子範知六安州時兵革頻仍民多死徙子範蠲減稅糧作勸

農文諭之

江南通志

明陳明善句容人洪武閒知六安州創建州治有惠澤及民山

賊聚眾劫掠州倖往捕遇害明善討平之

江南通志

康琚項城人洪武三年授六安州同知時庶務草創民多弗率

琚躬行德化助守所不逮以循卓擢永平府同知

江南通志

隋贊字從禮山東人洪武初授英山主簿嘗捕獲叛賊潘友文

等以功遷知縣復除虎患遷袁州通判

江南通志

孔善曲阜人洪武閒授英山訓導學問博洽敷教有方秩滿諸

生赴闕請畱遷教諭

江南通志

劉鎰羅山人宏治二年知六安州蠲宿負去苛斂產亡而稅存

者悉除之流民復業者甚眾州治屯衛相錯處之以公軍民咸

服江南通志

李瑄元氏人宏治閒知英山疏滯獄抑豪強卹里甲較士高下

而資以膏火江南通志

王坊字崇賢浙江人初任新淦以忤劉瑾謫廢瑾敗起知霍山編定賦役品格胥吏不得爲奸江南通志

歐陽德字崇一泰和人嘉靖三年知六安州毀淫祠建書院歲饑出粟分賑民疫爲購善藥濟之江南通志

邵德久餘姚人嘉靖二十九年知六安州築陂塘以溉田課文藝以造士鋤奸雪枉江南通志

胡澤通城人嘉靖中授英山教諭葺齋舍購書籍集諸生肄業其中句稽學田租稅以有餘惠寒士江南通志

徐縞豐城人嘉靖閒霍山典史海寇突至縞督鄉勇力戰走之



蛟水暴漲民多漂溺竊捐貲瘞葬流離者復出粟賑給存活數

百家民祀於東嶽廟左

江南通志

李懋榆字克倉安溪人萬曆九年知六安州州丁役舊有上中

下三等有家已消落而仍納上戶者檜定爲一則民賴以蘇設

社倉令民輸所餘粟擇里中富而有行誼者主之視豐歉爲收

放又置義田二區積歲入以贍貧者

江南通志

王榆字歷峯羅田人萬曆閒知六安州每朔望向神誓曰愛民

不及愛子殃及我子治郡不及治家殃及我家

江南通志

向文謨湖廣人萬曆閒知英山以邑小政簡請裁主簿省冗費

又請改折鳳倉米麥

江南通志

黃守經字伯通南城人萬曆三十八年知霍山執法不畏強禦

學宮移河北非善地急白當道遷復故址出俸錢爲諸生倡三

閏月而工竣

江南通志

李聯芳北直人崇禎時知六安州聞寇起陝西卽修城浚隍如寇將至役者迂之及去後二年寇薄城下州人據城固守始服其遠慮

江南通志

高在崙崇禎時知霍山縣流寇來攻在崙悉力捍禦城陷死之

江南通志

龔元祥長洲人崇禎時任霍山教諭與訓導姚允恭皆端嚴有師範寇至城陷姚適他往元祥冠服坐明倫堂賊環刃脅拜不屈死子年十六枕父屍慟哭亦被害越三日姚歸大慟曰吾死晚矣適賊又至乃憤激大罵至死不絕口姚盱眙縣人

江南通志

國朝史良植河南人年十八登進士第授英山知縣吏治精敏雖老成練達無以過之詳詢民瘼剔除宿弊順治六年楚賊侵英

良植單騎詣府乞師歸至石觜城賊眾突至被執不屈遂遇害

江南舊志

李浴日字滄所拔縣人順治初知六安州時兵燹之後民生未

遂浴日多方撫字政簡刑清一方賴之

江南通志

劉克孔字扶宇奉天人順治中知六安州當兵燹之後糧冊散

失徭役不均胥吏緣以為奸克孔按戶清查盡祛蠹弊士民戴

德焉

江南通志

門毓英瀋陽人順治五年知霍山縣時土寇作亂肘腋皆其黨

與毓英悉力捍禦籲憲請援身先士卒轉戰深入渠魁授首霍

城獲全

江南通志

朱衣浙江人署六安州事十九日斷結積案三百餘事

六安州志

賴允元字澹菴永安人康熙間知霍山自署堂柱云莫言天道

難窺酷吏子孫專報應勿謂民心無識貪夫姓字不遺忘

六安州志

鮑梓字艘亭南宮人雍正閒知霍山值秋雨大作山中萬蛟齊發梓已奉諱卸印纒經向水繞城號哭雇船接救附郭居民俱

得存活

六安州志

高淑曾山東沂水進士雍正閒官蒙城知縣六安知州蒙城六

安人皆稱其強直有爲

姚鼐文集  
新增

甘山字岱登奉新人乾隆閒知霍山向例縣署薪炭食物給值

不及十之五曰官價山至悉除之

六安州志

徐日紀字松圃桐廬人乾隆閒知英山創爲興賢會以資鄉試

諸生

英山縣志

德海滿洲人六安營參將敝衣蔬食日與兵弁講求臨陣克敵之法勉以忠君親上孳孳不倦嘉慶初教匪蔓延海嚴爲防守

營伍肅然

六安州志

趙宗良貴州平越人知英山十年政簡刑清愛民育士創凌雲

義學置義田清漏澤固修舉廢墜善政最多

英山縣志

吳學山江西高安人乾隆十一年任霍山壬申四月楚匪馬朝柱作亂蘄州首發其事斬霍接壤民駭甚學山以輕騎入山眾恃無恐捕餘黨株連數千人搜及霍學山廉知其枉請於長吏

得釋

霍山縣志

張掄甲山東金鄉人乾隆十七年攝霍山篆新學宮立書院發

城北石隄建康濟橋至今蒙其利

霍山縣志以上舊志

朱士達字恕齋江蘇寶應進士道光初署霍山知縣釐弊政培人材創奎文書院升壽州去邑人設長生位於書院累官湖北

布政使

霍山縣志以下新修

謝英字惕夫湖北黃岡舉人道光十八年任霍山知縣博學多

聞勤於課士修學宮葺城垣政教多洽民心時稱能吏

霍山縣志

吳鳴鏞字雲士江蘇吳江舉人六安訓導課士有方績葺州志

於節孝尤詳慎資助寒賤宦況蕭然卒官州人爲立教思碑

六安志

州志

胡嘉霖字子吉江甯舉人咸豐元年任霍山知縣黠民以路斃

乞匄波累地主嘉霖傲江甯生生堂章程由堂驗報髮逆竄楚

黃偏英霍嘉霖練鄉勇嚴保甲境內乂安以憂去起任天長禱

雨卒次日大雨

霍山縣志

蘇秀槐廣西貴縣舉人咸豐四年任英山知縣迭次督團從何

桂珍堵剿髮逆皆有功五年冬豫勇叛秀槐與何桂珍及前署

舒城知縣婁業士均死之

英山縣志  
舒城縣志

金寶樹字吟薌江蘇元和進士湖北知縣起復揀發安徽知州  
咸豐三年署和州團練堵剿兩載有餘六年署六安州知州以  
擒斬擒首王守沅功升同知直隸州七年春擒逆自鳳臺髮逆  
自桐城竄至城陷寶樹約六安營參將喜瀛及練首管韞輝等  
集眾萬餘計圖規復戰於西範店及城北十五里墩我軍敗績  
練勇死者千餘人寶樹喜瀛六安州同黃河清六安營守備趙  
霖新選懷甯長楓巡檢駱秉彥候選巡檢茅愴均死之俱蒙

賜卹

卹贈廕如例

福濟奏案  
六安州志

鄧元鎬任霍山縣知縣咸豐九年從巡撫翁同書守定遠城陷  
陣亡

旌卹

如例

翁同書奏案  
定遠縣志

泗州

漢孔安國字子國武之弟魯申公弟子爲臨淮太守其治官民

皆有廉節稱

漢書申公傳

路溫舒字長君鉅鹿人宣帝卽位上尚德緩刑書帝嘉納累官

臨淮太守治有異績

漢書本傳

薛宣字贛君剡人以御史中丞出守臨淮政化大行

漢書本傳

侯霸字君房河南密人王莽時霸官淮平大尹更始元年徵霸

百姓號哭遮道乞留且戒乳婦勿舉子曰侯君去必不能全使

者慮霸就徵臨淮必亂不敢授璽具以狀聞

後漢書本傳

朱暉字文季南陽宛人永平中爲臨淮太守所拔用皆勵行士

其諸報怨以義犯率得生濟其不義之囚卽時僵仆吏民畏愛

爲之謠曰強直自遂南陽朱季吏畏其威民懷其惠

後漢書本傳

孟嘗字伯周上虞人舉茂才令徐縣州郡表其能尚書楊喬稱



其清行出俗能幹絕羣

後漢書本傳

謝熙山陰人令徐縣明達有吏才

後漢紀

魏陳登除東陽長養耆育孤視民如傷

三國志張邈傳注

宋沈璞字道真武康人爲盱眙太守修城浚隍聚財石積鹽米

爲不可勝之算魏拓跋燾自率步騎數十萬攻城璞隨宜應拒

殄其大半燾乃遁走

宋書沈約自序增修

唐蘇晉藍田人爲泗州刺史以仁恕爲政吏民信服

舊唐書蘇珣傳

張伾以功遷泗州刺史值水患悉力捍禦卒完一城

舊唐書忠義傳泗

州志同按本傳以功遷泗州刺史居州十年擢右金吾衛大將軍未拜卒無值水患三句

崔珙博陵人有威重精吏治以拔萃異等累擢至泗州刺史得

士心

唐書本傳

杜愔萬年人咸通中爲泗州刺史龐勛反圍城處士辛諱勸出

家屬獨以身守愾曰吾出百口求生眾心搖矣不如與將士死  
生共之眾聞皆泣下賊將李圓傳城戰愾殺數百人未幾焚淮  
口晝夜戰不息來援軍盡爲圓所敗賊乃以鐵鎖絕淮流梯衝  
乘城糧盡爲薄餽以給勛遣圓入城約降愾怒殺之勛屢攻不  
得志遂解去圍凡十月愾拊循士皆殊死奮而辛諱冒圍出入  
糾輯援師卒完一州時稱爲難

唐書杜佑  
增修傳

五代江夢孫潯陽人楊吳時爲天長吏縣署有怪厲不可居夢  
孫焚香曰受命爲吏治事於此吾行不欺暗室奚畏君等怪遂  
絕爲諸生釋經至疑處輒斂衽曰此科先儒猶多異同安敢輕  
議諸君自擇所長可也葬之日遠方至者千餘人服衰者百許

一統志

宋段思恭澤州人開寶中代馬繼業知泗州下車矯其失綏撫

夷落訪求民病悉條奏免之後歷知壽州宿州竝著勞績宋史本傳

朱昂字舉之衡山人太宗時知泗州嘗聚淮水流屍三千爲冢

瘞之有戍卒謀亂昂誅其首惡支黨悉黃之

宋史本傳

劉仁諲永春人淳化中爲泗州刺史有清節官散俸薄雖藜藿

不充未嘗妄干人

志一統

歐陽載字則之廬陵人知泗州有浮屠誘民男女投淮水死載

盡捕其徒詰其奸民誅數人遣還鄉里者數百人遂毀其寺

歐陽

修工部郎中歐陽公墓志銘

歐陽觀廬陵人爲泗州判官夜治官書嘗屢廢而歎妻問之曰

此死獄也我求其生而不得爾

歐陽修瀛州表

趙抃字閱道西安人通判泗州濠守給廩賜不如法士卒欲變

守閉門不出轉運使檄抃攝治之抃至從容如平時州以無事

宋史  
本傳

傅楫字元通仙游人揚州司戶參軍攝天長令發摘隱伏姦猾

屏跡

宋史本傳

張夏知泗州值大水築隄禦之景祐初後守因其舊而加廣焉

歐陽修先

春亨集

陶令靖康閒知盱眙縣徽宗南幸以南山有十景詔所在清蹕

令辭以非旬日可辦帝嘉其直而止

南畿志

張述字紹明遂州人知泗州有政績

宋史本傳

賈公望字表之韓城人欽宗時知泗州靖康二年運使翁彥國

勤王至泗州逗畱不進公望責以大義始行及張邦昌僞命至

率官屬哭天慶觀聖祖殿焚其赦書

南畿志

孫暉爲泗州招信縣尉建炎三年金人陷泗州由招信將渡淮

暉將射士民兵禦之沈其數舟會大霧蔽日金人以疑兵縻暉

自上流渡兵城破死於敕書樓

宋史本傳

吳說紹興中知盱眙軍奏乞禁止採賊高宗謂貧民以此爲生

乃詔官司不得採賊而民間從便

明統志

夏俊紹興中盱眙縣尉金人入寇克泗州俊與士人胡昉部八

十四人夜攻泗城金守遁俊入城撫勞詔俊就知泗州

明統志

傅球

宋史作求

字命之考城人通判泗州淮水溢毀城朝廷遣中使

護築絕淮取土道遠度用卒六萬球相汴隄旁有高阜夷之得

土以漕運回舟載之省工費殆半

宋史本傳南畿志

田智潤理宗時爲泗州先鋒軍統制潮河壩之戰父子俱死於

兵詔贈智潤修武郎子永節郎立廟泗州賜額旌忠

宋史本傳

元李景道字克中太谷人爲盱眙尹天厯元年遷建縣治斬荆

棘鑿山趾費鉅而民不擾

江南通志

郝偁字子榮河閒人至元閒爲天長尹擇民閒童子可教者立塾置師絃誦相望又新廟學籍豪民隱蔽田七頃有奇入其租爲師生廩祿時人頌之

江南通志

明林庭蘭字建秀福建人洪武三年知盱眙縣潔己撫民以循

良稱

江南通志

方素易樂平人洪武中知盱眙縣廉方勇敢無所畏避吏民戴之太祖賜璽書勞以上尊丁母憂民伏闕乞畱任從之

江南通志

鄭仁憲字平之會稽人成化閒知天長縣興學校繕館舍修壇

墀立坊市凡政教之大者次第畢舉

江南通志

藍馥浮梁人成化十八年知五河縣創集場建義倉

江南通志

葛浩上虞人宏治十年知五河縣歲旱徒步禱雨往還數十里

躬親捕蝗卒不為災民築捕蝗臺於芟憩之所尚存  
江南通志

許弼宏治間知泗州在任六年積穀至二萬石年饑百姓多賴

以濟  
江南通志

汪應軫字子宿山陰人由庶常出知泗州武宗南巡江彬方用

事橫索供億應軫以一身當之民得無擾嘗遣人至浙西市小

桑數萬株課民樹藝尋擢給事中去之日艤舟龜山見家人載

石砧急命投於淮水至都猶上疏乞免泗州運糧養馬諸累明史

本傳 江  
南通志

潘槐宣化人嘉靖中知五河縣博聞強幹大著賢聲  
江南通志

林希元嘉靖中以大理評事謫判泗州歲大饑人相食青陽滄

湖嘯聚數百人希元躬往慰諭解散其黨且請貸其罪而賑卹

之境內以安  
江南通志

邵時敏字伯來餘姚人嘉靖間知天長築馬埧隄數百丈建二

石橋以便民民呼其隄曰邵公隄橋曰邵公橋

江南通志

楊子龍鄞縣人嘉靖中知天長縣首議經費里甲繼請撤還驛

傳及革護城河糶糴之稅至修學宮東西月池排築縣志皆關

爲政大體

江南通志

楊化隆慶中知泗州城內外石隄皆所創築

江南通志

陳永直由通判遷知泗州增築東南護城石隄請豁高家堰築

隄夫役五百名免徵草料銀數百兩

江南通志

浦朝柱定州人萬曆十五年知泗州事歲凶穀價騰涌出俸金

遠糴米麥平糶與民又以餘米作粥全活無算州屢被水患請

於河憲疏濬濬清河口門限沙民賴之

江南通志

潘士紳江西人萬曆中知五河縣一切羨耗贖銀盡爲捐革訟



至卽理案無留牘時他邑民有控於直指者將下某府其人不

欲改下某州又不欲叩頭曰願下五河其見信鄰封如此

江南通志

沈嘉賓萬全衛人萬厯中知五河縣寡言笑慎取予人號爲鐵

面公至接待士民和煦如春風拂人

江南通志

方堪新城人萬厯中知五河時滄沱二水橫流爲患堪築壩數

十丈南橋圯復治之今名方公橋

江南通志

伍惟善安福舉人知五河縣歲苦澇惟善繪圖力請且自爲疏

上之得賑濟免徵民賴全活者甚眾

江西通志新増

王寅錢塘人崇禎中由龍江都司調泗州護祖陵賊來犯卷甲

疾趨斬其先鋒一人戰自午迄申賊來益眾與守備陳正亨等

陷陣死

一統志

汪文燦字弢輔宜良人崇禎十六年由新野令遷泗州知州時

高傑兵駐州大肆焚掠文燦面乞總兵李朝雲朝雲佯諾仍不戢文燦握衣躍入城河漁舟救之得蘇李乃約束士卒泗民以

安

江南通志

蔣佳徵灌陽人崇禎閒知盱眙縣流寇破城不屈死事聞贈尚

寶卿廕一子

江南通志

羅萬象字光大南昌人崇禎時知天長縣賦額外分毫無所溢

減省吏胥裁足供事發摘奸隱豪黠懼伏

江南通志

胡淵永年人崇禎中爲盱眙縣主簿十五年賊再至士民悉遷

或言君非正官盍避之淵正色曰吾亦守土吏可偷生耶力戰

被執奮罵而死

一統志

章世純字大力臨川人懷宗時署天長教諭學通經史旁涉諸

子百家督課士子經濟實用

江南通志

國朝王師保四川人順治初知五河縣歲荒乏米漕餉莫辦詳請

以麥代米一邑便之

江南舊志

李毓秀字應詔沔池人順治二年知天長縣時屢經兵燹民多

流亡毓秀加意招徠勸課耕稼貧者給以牛種聽訟明決境無

冤民

一統志

王辛字菩山直隸人順治七年進士知天長縣莅官九載大著

政績值海寇陷城抱印自經死奉

旨贈按察司副使廕一子

一統志 江南舊志

傅應薦奉天人順治十二年知泗州時年甫逾冠曉練吏治尤

持重敦大體己亥夏淮漲灌城謠傳北隄己潰左右趨登舟應

薦叱曰吾他適如民何乃於隄前拜水疾呼聞者感泣禱畢水

勢驟減城得不沒

一統志

范三俊太谷人順治十八年知泗州深沈練達事至卽決創設

赤歷一書丁糧綱目燦若列眉迄今循其成法

江南通志

江映鯤字南溟閬中人康熙元年知天長邑苦里甲當差值年

動至破產映鯤痛爲革除民困以蘇又里甲分糧黠者糧多而

戶皆殷實懦者糧少而戶更凋瘠映鯤每里均以二十二石自

是里役無苑枯之異給便民自納單載糧數若干每月完銀若

干完卽注單里書收頭不得因緣爲奸民甚便之

一統志江南通志

袁象乾良鄉人康熙五年知泗州州數被水災田沒而糧額不

減民不能支象乾下車卽請上憲題蠲本州水沈拋荒田糧萬

五百有奇州人永賴

一統志江南通志

朱宏胙字徽蔭濟南人康熙七年知盱眙革除雜派定徵輸畫

一之法盱俗好訟輕生爲揭律通衢訟以衰止歲旱卽請蠲賑

又措銀買米分給饑民鄰封就食者盈萬時螭生徧野倏有羣

蝗過之螭皆附翼飛去歲以大豐舉卓異第一

一統志  
江南通志

孫丹字玉史福建浦城拔貢授天長知縣民有訟者不遺隸攝

但限期令至立與剖晰以事往鄉村聽民赴訴決判如流先是

城中盜賊縱橫捕為盜主者掠治之皆吐實乃下令鄰里先捕

者賞容隱者坐扳誣者釋由是盜賊屏跡建忠孝書院以課士

在官數載清節茂著以疾歸士民為立愛思碑

福建通志  
新增

郭起元閩縣人調盱眙攝泗州知州淮河泛濫居民蕩析起元

相度地勢周知要害創置盱眙城延紳纂縣志遷宿虹同知修

隄力除積弊築工堅固大汛無決

福建通志  
新增

李允升陝西西安人乾隆二十二年任泗州知州時淮水奔溢

虹泗當其下游允升築隄濬渠由渭橋而南至城西北之黃翠

溝數十里悉成沃壤

泗州志

林夢鯉山東掖縣人乾隆三十二年知天長縣行勸農之法親歷畝畝獎罰其勤惰暇時於四門九鎮種樹數萬株至今戒勿剪伐人比甘棠之遺愛焉

天長縣志

曹九成山西遼州人乾隆四十六年任五河精明慈惠案無留牘尤盡心荒政多方綏輯年雖凶不饑去之日人思其德祀名宦祠

五河縣志

五河縣志

張佩芳字蓀圃山西平定州進士乾隆中任歙縣知縣新學宮興水利修慶豐場黜淫祀除橫山妖石慎獄勤學增惠濟倉惠濟堂初課士斗山亭繼創問政書院延劉大槐教士有加調合肥升壽州知州建裕備倉八十間延梁巖主講循理書院士風大振擢泗州直隸知州賑水旱請放本色乞罷南門關稅開天

然間著有希音堂集陸宣公文集注劉大槐問政書院記 張

增新

劉珊字介純漢川人道光元年知泗州泗多水患居民苦之前  
收請濬濰河冀水有所容凡假帑至七萬三千有奇每年攤入  
地丁銀徵納號爲河帑泗民未享濬河之利已受帶徵之累珊  
甫莅任卽申請豁免以紓民力總督孫玉庭奏請得

俞允州民感之旋擢潁州守卒於官泗州志以上舊志

德溥字時泉漢軍正黃旗人任五河知縣道光辛卯水災捐廉  
撫卹詳辦賑濟實惠及民革藉戶訛詐之風除胥役需索之弊  
訪獲盜首數十人置諸法去官民懷思之五河縣志以下新修

陸豫字樹齋江蘇寶山拔貢咸豐四年任蕪湖知縣調署天長  
時髮逆逼近豫爲民捍禦勞瘁卒官接任者爲上元胡嘉霖字

子吉招集民勇設卡局日夜盤詰屢獲賊謀著有保甲團練規

條士民遵行賴以安堵大旱祈雨深自咎責遘疾而卒

天長縣志

厲自芳字蘭友浙江義烏舉人咸豐六年任盱眙知縣捐廉課

士發粟救荒偕都司博勒興阿等討平棚匪以憂去官盱眙人

立去思碑

盱眙縣志

許垣江蘇上元監生成豐七年署盱眙知縣九年髮賊撲盱眙

城陷死之奉

旨贈道銜建立專祠世襲雲騎尉

盱眙縣志 兵事司册

周來豫江西南豐監生署盱眙縣典史會饑民滋事來豫請募

勇平之並勸捐賑濟民心復定髮賊撲盱眙隨知縣許垣城守

及陷督勇力戰死之奉

旨贈鑾儀衛經歷銜附祀許垣專祠世襲雲騎尉

盱眙縣志 兵事司册



李承穎字勿齋順天宛平舉人署泗州知州咸豐八年擒匪擾境固守州城民賴以安九年擢城堅拒擒首竝出奇兵勝之積勞卒官民設木主祀之

虹鄉志

狄融字伯華江蘇溧陽舉人署五河知縣撫字催科政績爲最受代去咸豐八年縣被捻患巡撫福濟擇素愜輿情者復以融署五河勸辦團練擊走張澂李允九月張襲各擒數萬趨五河率練迎擊死之

恩卹如例

五河縣志

趙季輔字星齋河南鎮平人咸豐九年署泗州知州濬池修城滅火耗巨盜李攀桂陰通宿靈睢桃諸匪季輔親往設計竝其弟五雲殺之請增兵集練進剿賊驚走追殺幾盡

虹鄉志

鄭沅字養泉大興舉人任靈璧知縣有政績深洽民心咸豐十

年署泗州知州擒賊兩次撲城均率練擊退十一年在城東朱  
山剿擒陣亡經袁甲三奏於咸豐十一年奉

旨優卹

贈太僕寺卿銜建立專祠世襲雲騎尉

泗州志 虹鄉  
靈璧縣志

李金庚字實夫福建閩縣舉人同治初任盱眙知縣髮捻亂後  
流民稍復撫綏勸化不尚煩苛飛蝗過境不爲災三載去官民  
持香泣畱擢和州知州卒

盱眙  
縣志